

թողույր միայն վասն ամօթոյն զվարտիսն և զգտակն իւր վեղարաւն, որպէսզի տեսողացն յայտնի լիցի թէ ա՛յն է ի կախաղանին: Եւ օրս էր Ծաղկազարդ եւ գալուստ Տեառն մերոյ Քրիստոսի:

Բշխս (23 Մարտ). և աւուրքս որոնէին և զմեծամեծս Հոռոմոց եւ զպատրիգն եւս Երուսաղէմայ, զի փախան յորմէ այս գործեցաւ, վասն զի համախօհիւք են արարեալ զբանս: Եւ օր Բշխս, քանզի Գ օր եղև ի կախաղանին, հրաման տայ վէզիրն սաստկաբար զի զպատրիարքի մարմինն առցեն ի վայր և յազգաց նոքին ոչ ոք մի մօտեսցի¹⁾ անդ կամ երեւեսցի, այլ չորպաճին այնմ սահմանին տայ առնել զնա ի վայր, եւ եզին ի վերայ համալի եւ տարեալ ի Ղուսղափուն, արկեալ ի ծովն և չուան կապեալ ի վարտիցէն քաշէին զնա նաւավարքն²⁾ մինչև ի մէջս ծովուն, և քար կապեալ ի պարանոցն ընկղմեցին ի խորս ծովուն: Եւ աւուրքս վէզիրն յամենայն տեղիս մարդ եղ զի զփախուցեալ Հոռոմքն գտցէ, և զոմանս որ եզիտ՝ եղ ի բանտս մահապարտաց, և զոմանս եզիտ ի ծառայից փախուցելոցն և անդ եղ. և մուկնետիկ ձայնեալ ի մէջ շուկայիցն եթէ Հայ եղողքն զփակեղս իւրեանց խատ կապեսցեն որպէս և են, և Հոռոմքն՝ կապուտ: Եւ էին Հոռոմք յահ և ի դողունմն ամենայն ազգաւն իւրեանց՝ սոսկացեալ, կարծեցեալ գուցէ զամենայն ազգս ի սուր մաշեսցեն, և ոչ ելանէին յերեսս մարդոյ, և ինչանաւոր արանց նոցա խափանեալ էին ի տունս իւրեանց և ոչ զիտէին զելս իրացն իմանալ՝ թէ զի՛նչ լինիցի. և ի բերանս ամենեցուն այս էր խօսք՝ եթէ ի Զատկէ Կիրակիս զբանտարգեալ Հոռոմսն կախելոց են, զի յոյժ ազճատեցաւ անունն և տարածեցաւ ի տէրութիւնս և յիշխանութիւնս Տաճկաց և յամենայն թա-

1) մօտեսցէ.

2) նաւարարն.